



Worum e Sujet?

Jedes Johr gegen Ändi Summer
ploggt mängge Basler schwääre Kummer,
Mitti Septämber oder scho im Auguscht,
verliert är d Fraid und fyyt nur Fruscht,
denn s duet ihn ganz entsetzlig quäle,
ass me so frieh scho muess e Sujet wähle
fir die näggschti Fasnacht, denn die kunnt bald,
s goht nur no fimf sächs Möönet halt,
und zem Goschdym schnnydere, Larve mache,
Ladärne moole und anderi Sache
bruucht's Zyt, wo zimlig schnäll vergoht,
und wenn me jetzt nit aafot, isch's gly z spoot.
Doch e Sujet z finde, das isch schwär,
e zindendi Idee miesst här,
e Vollträffer, e Gaischesblitz,
doch s Hirni laider straikt e bitz,
und schliesslig losst me s Sueche sy,
denn s fällt aim iberhaupt nyt yy.
S isch alles scho do gsi, me het alles scho gseh,
ebbis wirklich Neys findsch niene meh,
und isch mol ebbis passiert, e gfundes Frässe,
hänn's d Lyt bis an d Fasnacht lengschtens vergässe.
Do wird me hässig und isch schlächt druf
und s kemme erschti Zwyyfel uf,
eb all dä Uffwand sich au däät lohne,
abgseh vo de Subventionene.
Worum e Sujet? Muess das sy?
Was isch dr Sinn und Zwägg drby?
Goht's nit au ohni? Wär's denn esoo
schlimm, ohni Sujet an d Fasnacht z go,
dr Cortège im Charivari z laufe
oder Waggisgoschdym in dr Rhybrugg z kaufe?
Worum so vyyl baschtle, wie nit ganz bache,
wenn me alles kennt vyyl aifacher mache?
Worum so vyyl krampfe im Larvekäller?
Us Plastik giesse gieng vyyl schnäll.
Worum macht me denn e so-n-e Wääse
zem e Zeedel dichte, wo kain duet lääse?
E neyi Latärne bruucht's doch kaini,
mir hänn jo vo dr letschte Fasnacht no aini.
Worum also e Sujet? Worum in aller Wält
verschwände mir so vyyl Zyt und Gäld,
zem jedes Johr e neys Sujet z gschtalte?
Worum nämme mir denn nit nomool s alte
vom letschte Johr? Wurd das nit länge?
Worum dien sy denn immer stirme und zwänge,
s miess e Sujet aane, en aktuells,
e bsunders luschtigs und originells?
Worum ka me nit aifach Fasnacht mache,
drumme, pfyffen und zämme lache?
Worum ka me nit aifach d Fasnacht gniess
ohni kreativ sy z miesse?

Doch, Hand uf s Härz, isch's wirklich so?
Sinn im Grund gno mir nit alli froh,
ass mir jedes Johr e Sujet hänn,
wil mir am Cortège zaige wänn,
ass mir Idee hänn, Humor und Witz,
und uns luschtig mache dien e bitz
iber Mode, Trends und anderi Sache,
wo mir drnääbe finde und zem Lache?
Und kumm, gib zue, fällt's dir nit schwär,
dir vorzstelle, wie d Fasnacht wär,
ganz ohni Sujets? Wo wär do dr Raiz?
Mir wurde laufe nur vo Baiz zue Baiz,
ohni Mainig, ohni Ussaag, e phantasielose Huffe,
nur drummlen und pfyffen und zwischedry aine suffice;
unseri Latärne wär
vorne wyss und hinde läär,
bim Zeedel hätsch s Gfyy, är syg gehaim,
denn s hätt kaini Väs und kaini Raim,
und s Schpiil wurd in ere Verklaidig laufe,
wo den im Internet kasch kaufe,
als Cowboys oder Indianer,
gmacht vo de Chinese oder Koreaner.
Isch's das, wo mir wänn? Nai, sicher nit,
s isch wichtig, as es Sujets git,
denn d'Sujets sinn, das glaub y stuur,
s Härz vo unsrer Fasnachtskultur,
wo mit Satire us kritischer Sicht
dr Wält e Spiegel hebt vor s Gsicht,
wo mit Erfindergaischt und Kinschtlerlälant
entlarvt, was nit guet isch, so ass am Änd,
d Lyt am Stroosserand nit nur dien lache,
sondern afeen, sich Gedanke z mache.
Dorum bruucht's Sujets, y hoff, dasch jetzt klar,
und e glunges Sujet isch wunderbar,
nur blybt mir, bevor y jetzt zämmepagg,
e Froog no mit bitterem Nääbeggsmagg:
Worum isch's schliesslig doch so gloffe,
ass die, vo dr Sujetentschaid hänn troffe,
obwohl sie diskutiert hänn vyyli Stunde,
fir die Jung Garde kai bessers Sujet hänn gfunde?

**D Ladäärne-Uusstellig uff em Minschterblatz und d Waage- und d Reg-
gwisyte-Uusstellig bi dr Kasärne sin vom Määntig znacht bis am Mitt-
wuche demorge. Deert und an de 3 Verkaufsständ in dr Stadt ka me
au alli Zeedel, d Schnitzelbängg, d Blaggede und dr Rädäbäng kaufe.
Kemmet am Sunntig no dr Fasnacht (17-19 Uhr) zer Zeedellääsede in
Käller vo dr Baseldytsche Bihni im Lohnhof. Dr Yydrift isch vergäbe.**

**Buebe und Maitli kenne ab em 7. Altersjohr in dr Pfyffer- und Drummel-
schuel vo dr VKB gratis e halb Johr go schnubbere.**

Yschryybe kasch di im VKB-Käller an dr Clarastrass 57, im 2. UG, am
Mäntig, 22. Hornig 2016, vom säggsi bis am aacht zoobe oder schigg dä
Coupon an Obmaa vo dr VKB Jungi Garde:

Severin Obertüfer, Büntengarten 31, 4147 Aesch, Delifoon: 061/751 21 01
s.obertuefer@bluewin.ch Meh Informatione lääse und Aamäldige ab-
schigge ka men au unter: **www.vkb.ch**



Namme und Vorname: _____

Adräss: _____

Delifoon: _____

Y mecht: pfyffe drumme

Dr Obmaa git no dr Fasnacht Bscheid